

Chhuah fan - Oct. 1984

NOVEMBER, 2015

(MISSION)

RAMTHAR

Kum 31-na



Special Issue



Email: ramtharchanchinbu@gmail.com

Fax No. 0389-2316410



Miao (Arunachal 'East') -a Missionary-te
leh BEC member thenkhatte,
Field Secretary hovin

SERMON

VÂN RAM CHU MI RETHEI LEH RIANGVAITE RAM A NI.....phêk 5 - 7

Ramthar Association Chanchinbu Thla kip Chhuak**Editorial Board 2013 - 15**

Editor	: Rev. Thangzauva	9612950043 (M)
Joint Editors	: Upa Lalrinmuana	9436142643 (M)
	: Upa Zoramthanga	9436362385 (M)
	: Pi C. Lalrampari	9436190803 (M)
News Editor	: Pu Lalbiakénga Fanai	9436366234 (M)
Cir. Manager	: Pu Lallawmnakima Hmar	8575178109 (M)
Publisher	: Rev. Lalchhuanmawia	9615952406 (M)

Member-te

Rev. Lalrinmawia	: Synod Moderator
Rev. B. Sângthanga	: Synod Secretary (Sr.)
Rev. P.C. Pachhúnga	: Executive Secy., i/c Mission
Rev. C. Cháwngliana	: BEC Member
Upa F. Lalfakzuala	: BEC Member

✉ Thu chhuah tûr nei chuan Email - ramtharchanchinbu@gmail.com-ah emaw lehlam chauhah ziakin Editor emaw Manager, Ramthar Chanchinbu, Synod Office, Aizawl, Mizoram (India) hnénah emaw thawn tûr a ni e.

✉ Ramthar Chanchinbua thu chhuah hi a ziaktu mawhphurhna a ni.

KUM KHAT LĀK MAN - ₹ 50/-

A CHHŪNGA THU AWMTE

1. Editor thukhawchâng	- 1
2. Keimahni	- 2-3
3. Ramthar Hluttute Huang	- 4
4. Sermon	- 5-7
5. BUHHMUN AṬANGIN:	- 8-20
(1) Lalpa, kan lāwm e	
(2) Pathian hnathawh ropui	
(3) Karbi Anglong Mission Field....	
6. Ramthar Feh	- 21-31
7. Advertisement	- 32



TAWRHNA LEH INDIA RAM KRISTIANTE

Tawrhna leh Kristiante hi lâk hran theih loh khawpin an inzawm tlat. Chhandamna siamtu Isua Krista, krawsa a tuarna azárah Kristianna hi lo ding thei chauh a ni a. Isua Krista zirtírte ngei pawhin kárlovah an Lalpa tán an tuar ve nghal mai a. Stephana chu Kristian *martar* hmasa ber a ni nghe nghe. Kristian hmasate khân lalte leh Rom sawrkar lak ata tihduhdahna nasa tak an tuar a. Thupuan Bu hi chutianga ringtu tuartute thlamuanna tùra ziaik a ni nghe nghe.

India ramah hian Kristiannarawn pu lúttute chu Isua zirtír zínga mi Thoma, Diduma an tih – Lal Isua thawhlehma ringhleltu kha a ni a. Palestina ram ata lo kalin kum AD 52-ah India ram, Madras-ah a lo lút a, Mylapore-ah a awm a; chu chu Madras khawpui thlang lampang a ni. Pûkah a inkulh a, Hindu puithiamhovin huain chu pûka a tawngt'ai lai chu AD 72 khân feiin an chhun hlum nia sawi a ni. Syrian Kohhran hi a din niin an sawi.

India ramah hian hun hrang hrangah Kristianten tihduhdahna an tuar a. India sipaite helna, tùna 'Independent suala indona hmasa ber' an tih tâk, 1957 lai vêl te khân Kristian tam takin nunna an chàh phah a ni.

Sadhu Sundar Singh-a, ni 18 December, 1904-a Hindu sakhua a tanga Kristiana a inleh khân harsatna a tâwk nasa hle. A tàwpah phei chuan a nu leh paten an in ata an hnawt chhuak a. Hetiang hian thil awmzia a sawi: "Ka thil hmuh leh hriat chu ka chhúngte ka hrilh a. Tûnah chuan Kristian ka ni ta. Thenkhatin 'a â ta a nih hi' min ti a; thenkhatin mumang neiah min ngai a; a tàwpah chuan ka hawi kîr dáwn tawh lo tih an hriatin min tiduhdah tãn ta a. Mahse, chûng min tiduhdahtute mai mai chu Krista ka neih hmaa ka rilru mangan nasatzia nêna tehkhin chuan eng thamah mah ka ruat lo. Min tihduhdahna leh harsatna min siamte chu tuar harsa pawh ka ti lo va," tiin.

Arunachal-a Kristianten an tuarna te, tûn hnai lawka Staines-a te pafa za motor chhúnga hal hlum an nih dân te, Orissa state-a Kristiante tuarna te, tûn thleng pawha a lang leh langsàr vak lova Kristianten kan tuarna hi khawvêlah langsàr takin târ lan ni lo mah se tawrhna hian India ram Kristiante hi min kalsan ngai lo.

Eng pawh ni se, India ramah kan awm emaw, khawi ramah pawh awm ila, Kristian kan nih avànga kan lo tuar a nih pawhin, zak lo tùr leh chhel taka hmachhawn thei tùra kan inbuatsaih a pawimawh. Chu chu Isua Krista kan zuina rah a ni si a.

K E I M A H N I

† TUARPUINA:

(1) Nl. H.C. Lalmuansangi, Staff Nurse, Noxatilla (Cachar Tlángram) pa, Pu. H.C. Lalchangliana, Serkhan chuan ni 13 September, 2015 khán chatuan ram min pansan.

(2) Upa Doremthanga, BEC member fapa, Pu Romalsawma (39) chu ni 14.09.2015 khán cancer avàngin Ramhlun Vengtharah a thi.

(3) Pu J. Rokamlova (69), Champhai Venglai, Ramthar chanchinbu Agent chhuanawm tak chuan ni 15 September, 2015 khán cancer avàngin chatuan ram min pansan. A thuziak hi September 2015 chhuakah tihchhuah a ni nghe nghe.

(4) Pu Ramdinpuia Renthlei, Evangelist, Khawnai (HM 'N') pa, Rev. R. Vanbela (70), Serkhan chu lúng ná avàngin ni 3 October, 2015 khan a thi. Rev. R. Vanbela hi Rev. R. Vanlaltluanga, Lecturer, ATC pa a ni bawk.

(5) Upa Manik-a (84), Sihthiang, SMB Missionary *pensioner* chu ni 7 September, 2015-a a lui kal a haw lo va. A tûk ni 8 September, 2015-ah a aiáwt chiahna hmunah a ruang hmuh a ni. Amah hi Pu J.C. Samuel-a, Evangelist Teacher, SHMS, Damdep-I (HM 'S')-a thawk m êk pa a ni bawk.

Hêng mite hi Synod Mission Board chuan a uiin an chhúngte a tuarpui takzet a ni. Pathianin awmpuiin thlamuan rawh se.

† CWM PROGRAMME-AH BOARD SECRETARY:

Council for World Mission buatsaih Partners in Mission Consultation chu ni 17 & 18 September, 2015 khán Hongkong (China)-ah neih a ni a. PCI aiawhin Rev. Lalchhuanmawia, Secretary, SMB chu telin, Mission rawngbàwlina atána missionary kan buatsaih dân leh enkawl dân te CWM-in sawi tùra a beisei

angin power point presentation tha takin a ti a. Kan mission rawngbawlna chanchin report chu member kalten ngaihnawm tiin sawi zui a hlawh hle a ni.

† **CSI PASTOR-TE REFRESHER COURSE NEIHPUI:**

Ni 13-20 September, 2015 chhung khán Church of South India Pastor 19-te chuan Refresher Course neiin Mizoramah an rawn chuang chhuak a. Ni 17 September, 2015 (1:00 p.m.–4:00 p.m.)-ah Rev. Dr. K. Lalrinkima, Principal, MTC leh Pu Lallawmnakima Hmar, Ramthar Circulation Manager-ten Synod Mission Board rawngbawlna chanchin tlánpui, power point presentation an neihpui a, zawhna zâwtin an sawi ho tha hle a ni.

† **KUI KRISTIANTE KAN KOHHRANAH LÀWM LÛT:**

Ni 27 September, 2015 (Pathianni) khán Odisha State chhunga Gilakutta khuaah New Life Kui Mission Church chu Presbyterian Kohhranah Rev. P.C. Pachhunga, Executive Secretary i/c Mission-in a làwm lût fel ta.

Kohhran 27 niin, member hi 2,829 lai an ni. Kui hnam hi Odisha-ah chuan tribal hnam lian ber niin State hrang hrangah an inzár pharh a. Odisha-ah chauh hian nuai 20 vel an awm. Mahni chite vei tak hnam an ni hi a phurawm hle. Kum thum vël ngun taka anmahni nëna indawrin Mission Board hotute leh Ramthar Commission an zir Chiang Hmasa a ni.

† **LUNGLEIAH MISSION CONSULTATION** :

Ni 30 September, 2015 (10:00 a.m.–4:00 p.m.) khán Lunglei Venglai Presbyterian Kohhranah Chakma awmna huam chhunga missionary-te tán consultation buatsaih a ni a. Rev. Dr. K. Lalrinkima, Principal, MTC chu resource person a ni. Hetah hian thawktute mi 96 an kal khâwm a. Group-ah inthen darhin resource person-in sawi ho tùra a buatsaihte an sawi ho va, an hlâwk tláng hle.

RAMTHAR HLUTTUTE HUANG

Kum 1984-a Ramthar chanchinbu a lo chhuah tir aṭang khân vawiin thleng hian ka lo la ve zêl a. Ka chanchinbu ngaihhlut leh thlâkhlelh ber, ka ngahhlelh êm êm a la ni reng a ni.



**PI CHAWIVÊLI
KANAN VENG,
AIZAWL**

Kohhran hna pui ber – Chanchin Tha puan hril rawngbâwl hna kan thawhna, kan thlawhhma, kan buhhmun chanchin hriat te hi ka thlahlel a, ka ngahhlelh phah ṭhin a ni. Hun harsa leh hrehawm kâra thawktute inpêkna leh thawh rimna chanchin han hriat te, ‘chutah chuan ringthar baptisma chang an aum ta’ tih chhiar tûr lo aum ṭhin hi a ropui ka ti a, ka lo lâwm ṭhin a ni. Kohhran hrang hrang, tha leh sum senga an inphalna leh ṭhahnemngaihna – Ramthar Feh chanchin te hian ka thla a timuang ṭhin.

Tûnah hian kum 85 lai ka lo ni ve ta a. Ka hriselna a lo tlahniamin ka lo chak lo ta hle mai. Chuti chung chuan Ramthar chanchinbu a lo thlen hi chuan ka la chhiar hrâm hrâm a; chu chuan ka nun chau tawh tak hi min tiharh a, ka hlimpui ber a la ni reng a ni.

Ramthar Chanchinbu hi Lalpan malsàwm zêl rawh se.

MISSIONARY TRAINING COLLEGE HRIATTIRNA

Missionary Training College (MTC)-ah Bachelor of Missiology (B.Miss) zir duh tan dil theih a ni leh ta. Dilna Form hi ₹ 50/- in office hun chhungin MTC Office atangin lak chhuah theih a ni e.

Dil thei chin	: Cl-XII pass chin
Dil theih ni hnukung	: January 31, 2016
Written Test	: March 1, 2016
Interview	: March 3, 2016

Principal
Missionary Training College
Mission Vengthlang
Ph No. 2310157/2301337/ 09612564113

SERMON**VÀNRAM CHU MI RETHEI LEH RIANGVAITE RAM A NI**

– Rev. C. Thalai

Jakoba chuan, “*Ka unau duh takte u, ngai teh u, Pathianin he khawvêl thila retheite hi rinnaa hausa tùr leh, amah hmangaihtute hnêna a tiam ram chu luahtu tùrahte a ruat lo vem ni?*” (Jakoba 2:5) tiin min hrilh a. Thupuan 2:5-ah, “*Hêng hi hrehawm nasa tak ata chhuakhote kha an ni, an puante Beràmno thisena suin an tivàr ta a,*” tih kan hmu bawk.

Tirhkoh Paula chuan Lalpa hming avàngin tihduhdahna tam tak a tuar òthin. “*Tin, vawi tam tak an vuak zawhin tan inah an khung a...a keahte chuan thing kawl an buntír tlat a,*” (Tirh 16:22-24) tih kan hmu bawk.

Hei chauh hi a ni lo; Lustra-ah te, Ikonion-ah te, Antiokei-ah te Chanchin T̃ha a hril avàngin Paula chu lungin an deng a. Thi tawhah an ngai a, an hnûk sawn a. Thi tawha an ngaih chu a lo tho leh a; chutichuan he thu ropui tak hi a lo sawi chhuak ta a ni: “*Hrehawm tam tak tuarin Pathian ramah kan lût tùr a ni rêng a ni,*” (Tirh 14:22). He thu hian rawngbáwtute min cho hlein ka hre òthin.

Kohhran Upa pakhat hian an Pastor hnênah, “Kohhranhote hian ka tlin lohna leh ka chhiatna hlir an sawi òthin a. Ka thil t̃ha tihte chu pakhat mah sawi tùr an hre lawi si lo. Chuvàngin, Upa ka nihna hi bansan mai ila a t̃ha zâwk ang,” tiin a sawi a. Pastor erawh chuan, “A ni maw? A nih leh kohhranhote hian an vaw ngai che em? I hmaiah chil an chhâk ngai em? I lû-ah hling lukhum an khumtír ngai che em?” tiin a zâwt a. Chu Kohhran Upa chuan Isua Kristan mi sualte avànga hrehawm leh mualphona tinreng a tuar dânte a hre chhuak uai uai mai a. Tichuan, “E khai! Ka Lalpa tán

retheihna leh mualphona hi ka lo va tuar tlēm tak êm!” tiin mittui tla chungin Pastor chu a hrilh ta a ni.

Tuarna nun hi Krista nun a ni a. Chuvàngin, Krista avànga hrehawm tuar tam apiang chu Krista leh kohhranhote tân rímtui an ni thín. *“Chhandam mékahte leh boral mékahte chuan Pathian tân Krista rímtui kan ní sí á”* (2 Kor 2:15). Rawngbàwlina kawnga Tírhkoh Paula chakna thurûk chu Krista vànga kawng tam taka hrehawm tuarna leh harsatna a tawh thínthe hi a ni a.

He khawpui pan tùr hian tangka sum emaw, rangkachak leh lungflu emaw a ngai lo; Lal Isua neitu nih hi a pawimawh ber a ni. Lalpa Pathian, rethei leh riangvaite min hmangaihtu chu chatuanin fakín awm rawh se. Amen.

Khawpui chanchin ka ngaihtuah mék lai hian ka rilruah missionary ropui tak chanchin hian

ka rilru a luah hneh hle. Vawi khat chu Armerica President Roosevelt-a leh Africa rama missionary, Morrison-a chu Africa khawmualpui ațangin hmun khatah New York panin an haw dun a. New York khawpui an han thleng chu President Roosevelt-a chu ropui takin mipui tam takin an lo hmuak a. Parthi mawi tak takte an lo awrhtír a.

Chutih lai chuan Morrison-a erawh chu chibai bûktu leh ngaihsaktu pawh nei lovin kil khatah a ding zum ve reng mai a. A han inngaihtuah a, a inkhawngaih êm êm mai a; tichuan Pathian hnênah a vuina thu leh a rilru natzia chu a thlen ta a. Pathian chuan, “Morrison, President Roosevelt-a chuan a ram a thleng alâwm! Nang erawh chuan i ram i la rawn thleng rih lo ve. I ram i rawn thlen ve hunah chuan President Roosevelt-a aia ropui zâwk daihin chawimawi i ni ngei ang,” tiin a lo chháng a. Chuta

tang chuan Pathian laka
a vuina chu a inchhîr ta
êm êm a, a lawmna
mittui chu tui angin a
biangah a luang hial a ni.

Morrison-a chu New
York a thlen niah tláwm
hle mah se Vàn Jerusalem,
hmangaihna khawpui a
thlen hunah a ropui dân
tùr hian ringtute chanvo
tùr a tilang hlein ka hre
thin. Hei hian thil tam
tak min ngaihtuahtîr a;
he leiah hian retheiin
vâkvai thin mah ila,
nakinah chatuan khua a
lo vâv hunah chuan
vantirhkohte khawpuiah
chuan hlim takin min lo
hmuak ang a, hmangaih
kal hmasate nèn làwmna
kim chu neiin kan
intâwk khâwm leh dâwn
a ni. Chumi hun lo thleng
tùr chu ka ngaihtuah a,
lung a tileng hle. Bible
chuan, “*Hetah khaw hmun*

*ngheet kan nei si lo va,
khaw lo la awm tùr chu kan
zawng zâwk a ni....Keini
zawng vâv khua leh tui kan
ni si a, vâv aţanga min
chhandamtu Lal Isua Krista
lo kal tùr chu nghâkhlel
takin kan thlir thin,”* (Heb
13:14; Phil 3:20) tiin a
sawi a ni.

‘Vânram chu rethei
leh riangvaite ram a ni’
tih hi mi hausa leh mi
rethei Lazara-te dinhmun
aţang hian a lang Chiang
hle a ni. Ro chan chhe
thei lo, Krista thisen zâra
kan chan tùr chu eng ang
taka ropui nge a nih ang
a, chu ram mawi chu eng
tikah tak thleng ve ang i
maw?

Aw le, he sermon
chhiartute zawng zawng
chungah Lal Isua Krista
khawngaihna lo awm
rawh se. Amen.

Ramthar chanchinbu la tam zual kohhran pangate:

- | | |
|--------------------------------|-------------------------------|
| 1. Electric Veng Kohhran - 445 | 2. Mission Veng Kohhran - 435 |
| 3. Champhai Vengthlang - 384 | 4. Bungkawn Kohhran - 318 |
| 5. Khatla Kohhran - 314 | |

Missionary tana Ramthar chanchinbu laksak tam zual pangate:

- | | |
|----------------------------|--------------------------------|
| 1. Ramhlun Kohhran - 500 | 2. Chanmari West Kohhran - 357 |
| 3. Bawngkawn Kohhran - 300 | 4. Chanmari Kohhran - 275 |
| 5. Venghlui Kohhran - 252 | |

Buhmun Añangin

LALPA, KAN LÂWM E

– *Lalbiaksanga (LBA)*
Evangelist, Patharkandi

Ziak mi ni lo mah ila Lalpa min hruaina leh kan awmna leh a chhehvêla Pathian hna thawh ropui tak lo lang hi bang lova min ñawngñaipuitu, kohhran leh mi mal ñahnemngaiten in lo hriat ka duh êm vângin theih ang angin ka han tár lang ang e.

Tûna kan awmna Patharkandi hi kum 2013 January-ah kan thleng ve rawih a. Heta kan awm tûr hi ka hriat tirhin hreh tak têin ka hreh a. Mahse Pathianin a ropuizia puang chhuak tûrin min la duh ve a nih ka ring a, tûn hi min hruai thleng a.

Patharkandi-ah hian 2013 thleng khân ringtu an la awm lo, a tih theih awm e. Chu mai ni lovin, ‘*hnam hrang hrang inawm pawlhna, khaw inlungual lo tak leh khaw sual tak mai, mi sual tamna khua*’ tia hriat a nih avângin keini tán chuan a huphurhawmin kan zuam lo takzet a ni. Missionary kan nih avângin kan tan in luah tûr a vângin hmuh a har êm êm mai a. Kan enkawl

tûr kohhran lah km 10-a hla a ni daih bawk si, rilru a buai duh map map ñhin hle mai. ‘*Mahse a rawng kan bàwl, Lal Isua pawh kha a pian dawn khân khawvêl mite chuan hnawlin thlen in pawh a hmu zo lo va, ran chaw pêkna thlengah i tán leh ka tán bul a rawn ñan a nih kha*’ tihte ka ngaihtuah a. ‘*In ña pui ni lo mah se kan chhúngkua kan len theiha kan mut theih chuan a tâwk*’ tiin bul chu kan han ñan ve a.

Kum a ral dawn meuh chuan hmelhriat mi chi hrang hrang kan lo siam ve hman a. Chûng ka hmelhriat zînga pakhat chu ‘*Gunda*’ (mi sual) tia kan awmna leh a chhehvêl, Mizoram ramri thlenga an hriat

lar êm êm mai a ni a. Chu Gunda-pa chu kan tân chuan Pathian mi tirh a ni ti ila, kan sawi سوالين ka ring lo. Chu pa chuan tân thlenga thlamuang tak leh nuam taka kan awma inkhâwmna atân kan hman theih tùr, in luah tùr min hmuhsak hlah mai! Kan va lâwm tak êm! ‘Mi sual/Gunda’ tia kan ngaihte pawh hian thatna lai an lo neiin kan tân pheih chuan an tangkai hle a ni.

Kan awmna atanga km. 10-a hla, Kolkalighat Kohhranah chuan theihtawpin kohhran member mi tlêm tê nèn kan bei ve nasa viau va. Kum a vei meuh chuan kan thawh ve tling lo takte leh lo awm tawhte thawh rim rah Lalpan min hmuhtir a, chhûngkaw pakhat (*member 7*) chuan baptisma an chang ta hlah mai! “*Lalpa, kan lawm e,*” tiin biangah mittui a luang lo thei lo. ‘Hmun thar zuan’ tih takah vei tùr a tamin thawh tùr lah a tam, thawh sèn a ni bawk si

lo. Beidawnga han rum cháng lah a tam. Kan kohhran member-te nèn Patharkandi-ah chuan theih ang angin Chanchin Tha hrilin hun kan hmang a.

A chángin Biala thawktu thenkhat te, Gospel Team te bâkah Zoram Kohhran – Kuli-kawn Masihi Sangati, Ramthar Committee leh Zarkawt Kohhran te pawhin rawngbâwlina te an rawn nei a. Keini pawhin a theihna mual mualah theih ang angin kan ti chho ve a. Hênga kan thawh beitham tak, tling lo tak leh bâng lova kan tâna kohhranho min tawngtaipui thinnate chu Pathianin malsâwm lehin, a vawi khatna atân tlangval 2 leh nula pakhatin kumkhuaa Isua hnungzui intiamin Bialtu Pastor Rev. Lalthanzuala kutah baptisma an chang ve leh ta! Pathian thiltih mak ka ti lo thei lo!

Ringthar zînga tlangval pakhat zâwkhan Hyderabad-ah *Mechanical Engineer* a

zir mék a, nula kha a farnu niin ani pawhin MBBS Entrance Test paltlangin, Doctor zir tùrin a inbuatsaih leh mék a ni. An chhúngkaw behchhanin nikum kum tìr lamah a vawikhatna atán *Preaching Station*, member 21 awmna chu *Barak Area Administrative Secretary*, Rev. Z.D. Lalhmachhuana chuan hawngin inkhâwmna bul kan òan ve thei ta! Lalpa, kan va lâwm êm! Làwm avàngin biangah mittui a luang lo thei lo.

Tûnah hian kan in luah mékah hian Pathianniah tluang takin kan inkhâwm ve thei zêl a. Patharkandi-ah hian Biak In ‘*kan tâ*’ tih tùr kan la nei rih lo va, kan duhin kan awt ve êm êm a ni. Kan biak in tùr dilin kan ringtharte nèn kan òawngtai ve tawp òhin a ni. Kohhranho pawhin Patharkandi-a kohhran òhang duang tak, Kristian biak in hmasa ber tùr kan neih ve ngei theih nân nasa lehzuala min lo òawngtaipui zêl tùrin kan ngen che u a ni.

Kum 2014 kum laihâwl vêlah chuan Kolkalighat-ah kan tih òhin dân pangngaiin, Inrinni zàn khawchhe hnuaiah òawngtai inkhâwm tùrin a awm ang ang chuan Biak In anrawn pan khâwm leh a. Chuta inkhâwm kan han òan kha Thlarau Thianghlimin hna a thawk a; ni dang ang lo tak maiin kan zai tuiin kan hlim phian mai a, mak kan ti hlawm hle. Kan ban hnua h pawh chuan ruah a la sur avàngin tu mah kan haw thei lo va. Zai rawt òha lehin kan zai leh ta a. Kan zai tui khawp mai a, Thlarau Thianghlimin hna rawn thawkin òawngtai rual kan rawt a. Heta òawngtai thupuia kan hman chu “*Lalpa, hma thar lâkna tùr, hmun thar, ringthar min pe rawh*” tih hi a ni. Inkhâwm zawng zawng lamtuala thingthia kut insuih tawnin kan òawngtai rual a.

Hemi òuma kan òawngtai chu kan òang bawk a, kan member-te pawh mittui tla zawih

zawihin an ÷awngñai a ni. ‘*Rawngbàwlnaa ka luh ve hnua Vai/ringthar ÷awngñai ka hmuh tawh zingah chuan an ti tak ber awm mang e,*’ ka ti. Kan ÷awngñai tawpah “*Pavitra Aatma aa, Pavitra Aatma aa*” (Thlarau Thianghlim, Thlarau Thianghlim) tih chu kan sa nawn tluk tluk a, kan tawp thei hrâm. Pathian min hruai dân teh daih leh a thiltih ropui, mak sizia kan hmu a, kan hlim takmeuh a ni. ‘*Lalpa, kan va lawm êm!*’ tih hi a ngai leh ÷hin.

Hemi hnu thla khat vêlah chuan ka thawhpui, Kraws Sipai hian, “*Baitakhal Catholic Biak Inah i va kal ang hmiang?*” tiin min rawn *phone* a. Catholic Biak Ina kan kal zawh chuan Baitakhala kan Kraws Sipai Anthony-a te inah kan va leng a. Inhmelhriatirna te kan neih zawh hnu chuan he thil hi min hrilh ta a: “*Hmanlai Angres (Sapho)-in min awp lai, 1800 kum vêla British Protestant Church leh thlan hlui vêl kan khuaah hian a awm asin,*”

tiin. Mak ka ti hle a, ka rin loh leh beisei loh deuh thil a nih avângin ka meng phâwk nasa mai a. Ka zâwt nawn sek a, fiah tùra va kal nghal mai ka duh a. Khua a tlai tawh bâkah ramhnua ngaw pik lutukin a khuh tawh a nih avângin a tûk lama kal tùrin rilru kan siam ta a.

A tûkah chuan kan va kal ta a. Mahse, kum 100 chuang tehmeuh enkawl loh a nih avângin a pikin luh a har êm êm a. Chumi ni chuan thlan hlui pakhat leh biak in hlui bang (*wall*) chiah kan hmu thei. He thu hi Bialtu Pastor leh Field Office lamah te hrilhin chutiang chuan theih ang anga chhui zuiin hma lâk a ni a. A awmna hmun hi thingpui huan ram a nih avângin thingpui huan neitu Basil International Private Ltd. Company Manager hnênah chuan a ram min pe lêta kan kuta hlan tùrin dilna kan theh lût ta a.

Beisei loh deuhvin thil a kal ta a, thla hnih

lai kan nghah hnu chuan *Manager* chuan nuai thum min *demand* a. Hma lâk chhun zawm dân từ a vâng hle mai. Mahse, Lalpan he lai hmuna min dah chhante ngaihtuahin, leh kum 1800 vêla Kristian biak in leh thlanmual hmun chuti maia enkawltu mumal awm lova a ram mai tûrte ka ngaihtuah a. *Manager* nèn chuan vawi duailo insual lek lekin kan inhnial a. “*He lai hmun hi in Tea Garden huam chhúnga aum a ni mai thei. Mahse, he lai hmunah hian kum 1800 vêl aṭang khân biak in leh thlanmual a aum a, Kristiante ta a ni. Min pe emaw, pe lo emaw, keini chuan he lai hmun hi kan tung dîng leh ang a, biak in kan sa dawn. Chu vàng chuan NOC (No Objection Certificate/ phàlna) min pe rawh,*” kan ti a.

Tichuan, ‘*buai leh buai*’ tiin a ram chu sam fai tûrin rilru kan siam ta a. Office lamah kan chanchin hrihlin kan A/S-in ram sam faina tûr

chéng sangkhat min pêk chuan a ram chu kan sam faitír ta tawp a. Chutah zet chuan kan rin loh leh kan beisei phâk bâk thil kan hmuchhuak ta! Biak in hlui leh thlan 17 kan sâm chhuak ta! Chu chu hriain Barak Area-a chanchinbumi, TV News lamte thlengin an rawn thleng khâwm ta ṭuk ṭuk mai a. Keini pawhin *evidence* leh ṭanchhan tûr ṭha deuh kan neih tâkah chuan *manager* hnênah biak in sak min remtihsak tûrin kan ngen nawn leh a. Chutia biak in hluite leh thlante kan hai chhuah leh tâkah chuan *manager* rilru pawh tihnema awmin NOC chu kan nei thei ta. Lalpa, kan va lâwm êm!

Baitakhal lama kan rawngbâwlina pawh theih ang angin kan kalpui zêl a. *Campaign* leh *counselling* te vawi eng emaw zât kan neih hnuah leh kohhranin báng lova min ṭawngtaipuinate Pathian-in malsâwmin, kum 2014 September thlaah Bialtu

Pastor Lalthanzuala Chawngthu chuan Preaching Station a hawng a, tûn thlengin tluang tak leh hlim takin inkhâwmna te kan nei ve thei zêl a ni. He khuaah hian tûn dinhmunah member 25 vêl kan nei mék baw k a ni.

He hmun mak ve êm êmna chhan chu, khatia Sâphovin an chhuahsana enkawltu mumal an awm loh tâkah chuan rem-chânga lain mi sual thenkhatin biak in bungrua leh a chung rangva te, thlan te chu haiin an lo khawih chiam ni tûr a ni. Mahse, a hnua kan hriat leh dânin, khâng biak in leh thlan vêl lo khawihtute kha rinhlelhwawm deuh deuh, thihna atân pawha châkawm vak loh leh mak takin an thi vek tawh a lo ni a. Khata biak in chung rangva lo rutu chu an inah ka va tlawh chhuak a. Kum 3 vêl kal ta khân â thutin rei lo têa a thih thu a nupui chuan min hrilh a ni. Chutiang chuan he hmun hi Pathian Thlarauvin a awmpui ngei a ni tih hai rual a ni lo.

He lai hmunah hian mi thahnemngai Pu R. Pakungan kan mamawhna hriain biak in sakna tûr, a ram lei belhna tûr Project List-a kan dah chu min chhansak a. Ram pawh lei fel tawh niin he lai hmuna biak in ram tawh tung ding leh tûrin kan inbuatsaih mék a ni. Hnathawh tûr a tamin thawktu keimah chauh ka nih avângin indaih loh a na thei ngei mai. Kohhranho, bâng lova min tawngtaipui thinten he hmuna biak in a lo dina, kohhran tha tak leh thang duang tak a nih theih nân nasa lehzuala min lo tawngtai-pui leh tûrin kan inngen takmeuh a ni.

Patharkandi leh a chhehvêla kan rawngbâwnaa Pathianin min hruaina leh, mihringin eng ti kawng maha kan tih theih loh tûra a hnathawh ropui tak tak kan hmuhte avâng hian lâwm avângin biangah mittui a luang lo thei lo. Lalpa, kan lâwm e.

PATHIAN HNATHAWH ROPUI

– Ghana Handique
Evangelist, Guwahati

Hmân deuh lawk khân ‘*Doctrine of God*’ tih Rev. Dr. H. Vanlalauva ziah ka chhiar a. Chuta òanga ka hriat chhuah tâk chu – Mizote hi hmangaihna ngah tak leh zai ngaina tak hnam an ni tih hi a ni a. Ka thinlung khawih angreng tak pakhat chu J.H. Lorrain (Pu Buanga) òawngkam: “Mizo tute pawhin mikhuah an thlenin a thlawnin an thleng òhin a. Mutna, zanriah leh tukòuan bâkah a zin lehzêlnaa a ei tùrin chaw an funsak òhin a ni,” tih hi a ni a. An tâna hlâwkna awm hauh lovin engtin nge chutiang chuan an tih theih le? Ka thinlunga chhanna lo thleng chu ‘Pathian hmangaihna avàng a ni’ tih hi a ni. Chumi dikzia chu Mizorama Kelkang khua ka tlawh òumin ka hmu chiang hle.

Tûn hnai têah kan Kohhran Committee rêl angin Kelkangah harhna chhimin mi sawm leh panga kan han kal ve a. Vairengte kan thlen hmain kan *Inner Line Permit* (ILP) chu kan ken theihnghilh daih mai tih kan hre chhuak a, lêh lehna chi a nih tawh loh avangin kan tlân zêl ta tho va. Check Gate-ah chuan police pahnihin min lo *check-in*, lehkha pawimawhte min dil a, kan nei dêr si lo va. Mahse chuta Police Officer fel

tak chuan, “Eng pawh ni se, hmun hla tak aòanga Pathian ropuina atâna lo kal an ni a. Chuvàngin, kal tlang kan remti ang,” tia a sawi ri ka hriat chuan min khawih takzet a ni. Motor chhúngah chuan ka hnuk a lo ulh òeuh nghe nghe a ni.

Aizawl Electric Veng Kohhran KòP-ten zân dâr 12:30 thleng min lo nghak a nih chu! Chu mai a ni lo, kan ei khamah chaw an ei ve chauh! A va mak êm! Ka

thinlungah zawhna a lo lût nghal – ‘Mi dangte tân hetiang hian ka ti ve thei ang em?’ A tûk zingah tûkthuan min la buat-saihsak cheu va, kan ei khamah Kelkang panin kan kal leh ta a.

A la mak lehzêl mai! Saitual KṚP member-te chuan chawchhun min lo siamsak leh ta tlat mai! Vawi khat mah la inhmu lo leh la inhre ngai lo kan ni si! Chu chawchhun kal tlang chuan Pathian hmangaihna ka hmu a ni.

Ka sawi hmai hauh loh tùr chu Khawzawla thingpui dawra kan chawlh thu hi a ni a. Thingpui leh a hmeh chi hrang hrang bâkah hmawmsawmte kan ei hlawm a. A man kan han pe tùr chu dawr nghaktunu chuan a la duh ta tlat lo mai! “Pathian ropui nâna Lal Isua hminga ka tih theih ve tâwk,” tiin a țang tlat mai. A va mak êm! Pathian hmangaihna ropui tak chu Chiang takin ka hmu leh ta a ni.

Thil mak dang a la awm cheu: *Nghah loh Dâwr chu!* Kalkawngah chuan dâwr, a nghâktu awm si lo kan hmu! Mite pawh chuan rinawm takin an duh zâwng chu a man inziak zât ang chuan an lei a, pawisa chu a bawm tùra an lo dah saah chuan an dah mai a ni. A ropuiin a mak thlawt a ni.

A tàwpah chuan Kelkang chu kan han thleng ta a. Mikhual semtute chuan biak in bul lawka in pakhatatah min dah a. Thil mak dang kan hmu leh ta. Kan thlen inpa chuan a in chu ni thum chhúng awm lohnanin, keini mikhualho chauh chu kan awm a nih chu! A tûk zingah ráwlthar pahni an rawn kal a, thawh tùr awm ang ang an rawn thawk bawrh bawrh mai a. Tui an chawi a, in an tifai a, bawlhhlawh an paih bawk a – hlawh eng mah nei lovin! Pathian hnathawh ropui tak ka hmu leh ta; an hnên ațanga zir tùr ka va ngah tak êm!

Kelkangah chuan hmun pawimawh tak tak – Hmun Thianghlim, Gilgal, Moria, Peniel leh Gethsemane a awm a, kan tlawh vek a ni. Ring takin, kan âw zawng zawngin kan țawngțai a. Kan kalna hmun hrang hrangah Gethsemane chu ka theihngihlil ngai tawh lo vang. Tlangval pakhat hian min kaihruai a; a hawiher leh chêtzia ațangin chiang takin chu tlangval chu Thlarau Thianghlimin a kaihruai a ni tih ka hre thei a ni.

țawngțai tura ka țhiante nena kan kal lai chuan ka ke chu a sai hlawk hlawk a, eng emaw ti tak hian ka awmin ka hria. Min hruaitu Pu Lalbiaknunga (Evangelist, Guwahati) chuan mahni tan chauhva țawngțai lova Assam ram pum pui tana țawngțai tulin min hrilh hlawm a. Ding chung a țawngțaiin, Pathian hnênah Assam ram chhunga a ropuina lantir tulin ka dil a; thlarau bo zawng zawngte tan ka țawngțai baw a.

Thawklehkhatah theh thal tawp ang maiin leiah chuan ka tlu țhuai mai a. Âw hian, “Ghana, Pathianin a hmangaih che asin!” tiin min rawn hrilh a. Chu âw chu kan Pastor R. Vanlalngena (Guwahati) âw chiah niin ka hria a! Ka thil dil nena inpersan takin Pathian chhanna ka dawng a ni. Leiah chuan ka țap a, minute 20 dawn lai ka țap a ni. Pathian meuhvin min hmangaih chuan thil dang eng mah a ngai tawh lo a ni (A hnuah he thil hi kan Pastor ka hrilh a, ani chuan, “Hei hi khawngaihna mak a ni. Pathian hian a hmangaih takzet che a ni e,” tiin min chhang a ni).

Vawiinah hian a hmangaihna ropui tak avangin Pathian hnênah lawm thu ka sawi a. He kan zin chhunga min buaipuitu zawng zawngte chungah pawh lawm thu ka sawi baw a ni.

“Lalpa, ka lawm e. He khawvelah hian mi sualte lam tulin i lo kal

ngei a. Kei pawh mi Min duhsaktute min pêk
 sual ka ni e. Mi sual avângin lâwm thu ka
 ni mah ila, nangin min sawi e.”
 hmangaih si a. Iropuina
 atâna inpete chu i tân an Pathianin Kelkang hi
 va hlu êm! Ka ngaihtuah- a Thlaraubin chenchilh
 na hian a phâk lo a ni. zêl rawh se.

KARBI ANGLONG MISSION FIELD & KARBI ANGLONG SYNOD

– Rev. J.H. Zaikima, Field Secretary

Karbi hnamin Mizoram Presbyterian Kohhran kaltlanga Pathian khawngaihna leh malsâwmna tam tak an dawn hi a hluin a ropui a; sawi sen a ni lo va, thua sawi fiah zawh rual lah a ni hek lo. Kum 1968 daih tawhah khân kan Synod chuan missionary a tîr a. Kum 21 liam hnu 1989 khân Karbi Anglong Mission Field chu hawn a ni ta a. Field hawn aţangin kum 25 zet a lo liam ta. A la ţhang mэк zêl a ni. Field hawn aţanga kum 22-na (2011)-ah Pastor Bial thar hawn a ni a; tichuan, kan Field-ah Pastor Bial pariat a lo awm ta a ni. Karbi Anglong Synod rem tihnain ni 25 June, 2015 khân Pastor Bial pariat chu pali ve vea inţhenin *Presbytery* thar siam a lo ni leh ta a ni. Karbi Anglong Field-ah *Presbytery* 2, Pastor Bial 8, Kohhran 48, *Preaching Station* 17 leh *Fellowship* 19; Kohhran member 7,236 leh dânzawhkim 3,794 kan awm mэк a ni.

Mission rawngbâwl- Medical Worker 8 awmin
 naah hian Missionary missionary zawng zawng
 Pastor 7, Evangelist 19, 132 kan ni. Chanchin
 Evangelist Teacher 91, Tha hrilna hmanraw tha
 Field Office leh School bera kan ngaih tlat
 Office-a thawk 7 leh avângin High School 3,

Middle School 3 leh Primary School 1 kan nei a. Zirtirtu kan thahnem hle na a, evangelism rawngbàwlinaah kan zirtirtute hian theihtâwp an chhuah reng baw a ni.

Kohhran hmasâwnna hi chak vak lo mah se a che ve reng a. Kawng hrang hrangin training kan nei ve reng a, a sâwt êm êm baw a ni. Pathian Thlarau Thianghlim hnathawh kan châk a, kan duh a; nasa takin thawnghaiin kan dil reng a ni. Kan Pathian Biak Inkhâwm lam pawhin hma a sâwn zêl a. *Sunday School* puitling zirilaibu neiin Nilai zân thupui te kan zir a. Hêng hi kan Pastor leh missionary-ten an ziaak mai thin a, kum rei tak kalpui a ni tawh. Naupang *Sunday School* zirilaibu erawh chu MSSU thawmin Karbi thawnga lehlin mai a ni a. *Department* pawh Sakramen *Department* tih chauh lo chu kan nei vek a, Naupang Inkhâwmpui te pawh hun rei tak neih a ni tawh.

Karbi Anglong-a kan kohhran mite hi a tam ber chu Middle Class hnuai lam, mi rethei, khawsak harsa ve tak tak, ni tina ei zawng chawp an ni ber a. Thilpêk rawngbàwlinaah hian hmasâwn chak a har hle chungin chhúngkaw tam tak chuan sawma pakhat pête chu tih dân pangngaiah an neih ve tawh. Chutih lai chuan thawhlâwm erawh a pung chak lo hle a. Missionary thahnem takte avâng erawh chuan kum tinin a pung tam ve tial tial a ni. Tangka kum liam ta khân kan Field Pathian ram thawhlâwm chu ₹ 62,93,761/- a ni a; hmun lia thêna hmun thum (³/₄) hi missionary thawhlâwm a ni. Kohhran leh Bial huaptea *Finance Campaign* neih ve reng a ni a, Pathianin a hman zêl ang.

Karbi Anglong-a Presbyterian Kohhran páwl pakhat, *Presbyterian Church Karbi Anglong General Assembly Administrative Area* (PCKGAAA)

te hi 1960 aţangin KJP Synod hnuaiah *Presbytery* pakhata siam a ni a. Kum 2000-ah khân *Presbytery* pahnihah then leh a ni a. *PCI General Assembly* chuan Karbi Anglong-a Presbyterian Kohhrante chu mahni kea dintîr dân kawng zawngin *PCI Administrative Area*-ah kum 2006 khân a siam a; *Assembly Officer* dahin Kohhran chu enkawl a ni a. PCKGAAA Annual Assembly 2012 Diphu-a an neihah Synod dil rawt a ni a. Mahse, *Presbytery* pahnih chauh tân Synod siam theih a nih loh avângin 2013-ah PCKGAAA hnuaia *Presbytery* pahniha Pastor Bial 12 chu *Presbytery* 4-ah siam a ni ta a. PCKGAAA Annual Assembly 2014 chuan *PCI General Assembly* 2014-ah Karbi Anglong Synod dil a remti a. Dil a nih angin *PCI General Assembly* chuan remchâng hmasa bera Karbi Anglong Synod chu hawn tùrin a rel ta a. *PCI General Assembly Administrative*-ah kum 8 lai an awm tihna a ni.

PCI General Assembly in PCKGAAA a siam lai khân Karbi Anglong-a Presbyterian Kohhran awmte chu Synod pakhata siam hi a tum rêng a ni a. Hetah hian Karbi Anglong-a Presbyterian Kohhran, Mizoram Synod hnuaia mite pawh tel vek tùra ngaih a ni. Presbyterian group hnihte Synod pakhata siam tumna kawnga *PCI* hmalâkna erawh a hnufûm hle a; hmalâkna sawi tham a awm lo tih theih a ni. *PCI General Assembly* (May 2014) neih hma lawk, hun chêp takah khân *consultation on unification* buatsaihin PCKGAAA lam kohhran hrulaitute leh Karbi Anglong Presbyterian Church (KAPC), Mizoram Synod hnuaia Kohhran hrulaitute inhmu khâwm chuan Synod pakhata awm chu a thuphungin tha an ti a. *PCI General Assembly* neih hnu lamah a remchan dân ang anga hma lain Mizoram Synod pawhin Karbi Anglong Synod-a Mission Field

lam kohhranho awm chu ðha a ti a. 2014 Synod-ah pawh sawi ho niin Karbi Anglong Synod-a tel ve chu remtih a ni a. PCI Executive Committee remruatnain March ni 29, 2015 khân Karbi Anglong Synod chu hawn a ni ta a. Synod tin aiawh leh Synod Mission Board hotute pawh an tel. Kohhranhovin an hlut êm êm a, he *programme*-ah hian mi tam tak an tel a ni.

Tichuan, Karbi Anglong Synod chu Karbi Anglong-a Presbyterian Kohhran group pahnih, KJP Synod leh Mizoram Synod hnuai (*Mission Field*)-a mite infin khâwm a lo ni ta a ni. KJP Synod emaw Mizoram Synod hnuaia Presbyterian Kohhranhote emaw siam bîk Synod ni lovin, kohhranhote inzawm khâwm Synod a ni. Karbi Anglong Mission Field chu Synod-ah siam a ni lo va, Karbi Anglong Synod-ah a tel ve chauh a ni. Mission Field chu a la pangngai reng a ni.

Ram pakhata awm, hnam khat, ðawng thummun, India ram Presbyterian Kohhran ni ve ve bawk si Synod pakhata an awm thei hi a ðhain, Karbi hnam tân a hlu êm êm a ni. Kum 50 a liam meuh chuan a ðhatzia an la hmu Chiang Hle ang. Synod hmasâwn leh ðhang chak tak a nih theih nân inpumkhatna ðha an mamawh êm êm a. Thawh hona ðha an neih a ðul bawk a; chutiang an nih theih nân i ðawngtaipui ðhin ang u.

Tûnah hian Mission Field rawngbâwlna chu a pangngaiin a la kal zêl a. Kan rawngbâwlna hi kum tam tak an la mamawh dawn a ni. ‘Synod an ni tawh a’ tia kan rawngbâwlnate hnuchhawn nghal mai tùr kan ni lo. Synod hranga rawngbâwl tùrin bul an ðan chauh va, kawng tinrenga kan puih hi an la mamawh tak zet a ni. Kan ðhahnemngaihna tha thlah chuang lovin Karbi hnamte hnênah Chanchin ðha hi i hlui zêl ang u.

RAMTHAR FEH

1.

1. **Field hming** : Tripura Mission Field
2. **Khua** : Thailih Para
3. **Tlawh hun chhúng** : Ni 27 Oct. – 1 Nov., 2014
4. **Tlawhtu** : Electric Veng Kohhran
5. **Kal zât** : Mipa 14, hmeichhia 2
6. **Tlawh chhan** : Hnathawh
7. **Hnathawh** : Biak in leh hulhliap sak
8. **Senso zât** : ₹ 1,87,280/-

Hun hman dân : Thawktute ngenna angin Thailih Para Biak In (24x15 ft) leh hulhliap (10x6ft) chu kár khat chhúngin ka sa zo vek thei a. Pulpit, maichàm, lectern, leh thutthlengte an mamawh tâwk anga siam vek a ni a. Mistiri paruk telin mi 16 bâkah Rev. Lalmuanawma, Bialtu Pastor leh Pro. Pastor Laldawngliana te hovin Bial chhúng thawktute nèn kan thawk rim tláng hle. Pastor hovin thawktuten engkim ruahmanna fel tak an neih sa avàngin hna pawh a sâwt phah hle a ni. Tichuan, tluang takin kan zawh fel hnuah Zirtâwpni tlai dár 4:00-ah Bialtu Pastor Lalmuanawman Thailih Para Biak In thar chu a hawng nghal a. Tlaiah Biak In hawanna ruai kan theh a, kohhranhote an phur hle. Biak in sak chhúng hian Pathian awmpuina leh hruaina kan dawng nasa hle. Forest lamin min tihbuai an châk hle nain buaina awm lovin kan zo thei a. A sak chhúng zawnga min awmpuitu Pathian chu fakin awm rawh se.

Report tul dang : Thailih Para hi Ganganagar Biala awm a ni a. Kristian la awm lohna; Reang (Bru) in 52 vêl awmna khua a ni. Kan kohhran bultumin ni 24-27 June, 2014 khân crusade neih a ni a, Speaker atân Pro. Pastor Laldawngliana hman a ni a. Crusade-ah hian mi 19-in baptisma an chang a ni. Kan kohhran chawm tùrin anmahni hnam, Dev Singh-a chu Evangelist-a thawk tùrin rawih nghal a ni a. An pung zêl a, mi 40 chuang an lo ni ta a. Tirhkoh chenna inah an inkhâwm mai thín a. Khawtláng hruaitute an inhawng khawp mai a, an khaw

puma Kristian an la nih theih an beisei hial a ni. A khaw hotuten biak in hmun tha tak an pe nghal bawk.

– *Lianchungnunga*

Electric Veng Kohhran Ramthar Committee Ziaktu

2.

- | | |
|----------------------------|--------------------------|
| 1. Field hming | : Home Mission South |
| 2. Khua | : Tuithumhnar |
| 3. Tlawh hun chhúng | : Ni 24–29 Nov., 2014 |
| 4. Tlawhtu | : Electric Veng Kohhran |
| 5. Kal zât | : Mipa 20, hmeichhia 1 |
| 6. Tlawh chhan | : Hnathawh |
| 7. Hnathawh | : Biak In (52x30 ft) sak |
| 8. Senso zât | : ₹ 1,05,845/- |

Hun hman dân : Thawktute ngenna angin Tuithumhnar Biak In chu ni 4 chhúng kan sa a. Kan thawh hmain ITI Veng Kohhranin a bante phunin a kalkhang an lo chhuang tawh a ni. Pastor Lalbiakhlira leh Pro. Pastor Zonunsanga-ten min tawiawm thain bungrua leh engkim ruahmanna fel tak an lo nei vek a, hna pawh a sâwt phah hle. Ni 4 chhúng hian a chung rangva chih theihin kan peih hman vek a. Pathian awmpuina kan dawng nasa êm êm a, kohhran mipui pawh an phur tláng hle. Kan haw hnu kár hnih chhúngin a chung te chihin an luah nghal thu kan dawng a, a làwmawm lehzual. Kan thawh chhúng zawnga min awmpuitu Pathian chu fakin awm rawh se.

Report tul dang : Tuithumhnar hi Lawngtlai District-a awm a ni a, Aizawl atengin ni khat leh chawhma kal vêl a ni. Pastor thuthmun a ni. Kohhran sikul a awm a, thawktu Evangelist Teacher 4 an awm bawk. In 82 an awm a, kan kohhran in 21; member 115, dzk 60, Upa 2 leh T. Upa 3 an awm. Kohhran dang pahnih – Lairam Isua Krista Baptist Kohhran (LIKBK) leh UPC in 6 an awm bawk. A mi chêngte hi Lai leh Bâwm hnam an ni.

– *Lianchungnunga*

Electric Veng Kohhran Ramthar Committee Ziaktu

3.

- | | |
|----------------------------|---------------------------|
| 1. Field hming | : Home Mission North |
| 2. Khua | : Sihthiang |
| 3. Tlawh hun chhúng | : Ni 24–29 Nov., 2014 |
| 4. Tlawhtu | : Lily Veng Kohhran |
| 5. Kal zât | : Mipa 15 |
| 6. Tlawh chhan | : Hnathawh |
| 7. Hnathawh | : Primary School sak that |
| 8. Senso zât | : ₹ 43,130/- |

Làwmawm lam : Thawktute leh Upaten min lo dawngsawng tha a. An inpekna leh thawh hona a tha bawk a, a làwmawm kan ti tak zet a ni.

Report tul dang : Sikul (60x15 ft.) sak that a ni a. Hmanraw awm sa vek a ni a. Kan sum senso tar lan hi bus hmanna leh ei leh inna senso a ni. Sihthiang chhehvêla Mizo leilet enkawltu hnam dang (Vai) awmte hi 100 vêl an ni a, Chanchin Tha hrilh an la dawng ngai lo niin an insawi a, an veiawm hle mai.

– C. Kamlava

Lily Veng Kohhran Ramthar Committee Ziaktu

4.

- | | |
|----------------------------|--|
| 1. Field hming | : Arunachal E leh Karbi Anglong |
| 2. Khua | : Khasan (Aru. E); Silonijan, Koilamati, Chokihola & Diphu (Karbi Anglong) |
| 3. Tlawh hun chhúng | : Ni 24 Nov. – 1 Dec., 2014 |
| 4. Tlawhtu | : Bethlehem Kohhran |
| 5. Kal zât | : Mipa 9 |
| 6. Tlawh chhan | : Thawktute tlawh chhuah leh thilpek hlan |
| 7. Senso zât | : ₹ 65,175/- |

Arunachal East lamah : Tlaivara zan hnih kan tlan hnuah ni 26.11.2014 zing dar 9:00-ah Khasan Mission Compound kan thlang a. Tukthuan ei khamah Chingsa Kohhran Biak In, a tuk tuk leh maia Preaching Station-a hawn tur kawngkatê paruk leh kawngkapui pakhat vuahin hna kan thawk nghal a. Hetia hna thawh tur a lo awma,

kan thawk nghal mai hi kan lâwm hle a ni; tlai dár 4:00 vêlah kan zo. Zàn lamah inñhen darhin, Khasan Biak Inah leh Kuttum Biak Inah kan inkhâwm a; Kuttum Kohhran tân khuang kan pe a ni.

Lâwmawm lam : Missionary-te hmél leh he laia Synod Compound ram petu fakawmzia te, Chingsa Biak in hmun petute hmél kan hmuhin kan lâwm hle a ni. A tûkah sikul building, ruahmanna thar leh luah lai te, thawktute chenna te kan tlawh a. Ram hmunhma nuam tak, chenna in leh biak in nuam leh ðha tak kan hmu a; kan thawktute hlim hmél leh min thlahlel hmél kan han hmu kha kan lâwm hle a ni.

Karbi Anglong lamah : Ni 27.11.2014 zàn tlaivár ðhaka kan tlan leh hnuin a tûk zing varñianah Silonijan kan thleng leh a. Thawktute leh he lai hmuna work camp neia lo awm mék, Kolasib Hmar Veng Kohhranten min lo dawngsawng a. Silonijan khua hi Centre-a hmangin heta ðang hian Chokihola leh Koilamati khuate kan tlawh a. Chokihola-ah hian Pitilangso Kohhran tân dár kan pe a. Dolojan Kohhran Biak In, *pulpit* hnung lam bang la nei lo, phelsêp maia an pin te kan tlawh chuan rilru a khawih hle. Koilamati tlawh lehin thawktuten kohhran hrang hrang enkawl bik neiin hla tak takah an inkhâwm ðhin thu te, Missionary Staff Nurse an rinzia te leh damdawi leh hmanrua an indaih loh thu han hriat te khân Zoram lama awmte ðan lâk a ngaihzia min hriattir a ni. Silonijan khuaah hian Pathianni hmangin an kohhran tân khuang tê kan pe a. He khuaah hian harhna a thleng mék a, Karbi Field pumah he harhna hi a darh zau zêlna tûra an ðahnemngaihzia te kan hmu a ni. Kaziranga Sanctuary aþanga chhuak – sai, zawng, sakei leh rûlten a tihthlabâr ðhinzia te, thosi tamzia han hriat te khân rinawm taka thawkin an hnaah thawktute an tui a ni tih kan hria a ni.

Chi leh chi avànga buaina awm reng a nih avàngin bandh huaihawt tum nia kan hriat avàngin hmanhmawh takin Pathianni tlaiah hian Diphu panin kan chhuak a. Diphu Mission Compound chu tlai dár 4:30-ah kan thleng

a. Office Assistant, Rebecca Saidingpuii Sailovin min lo mikhual a. Field Secretary Rev. P.B. Zaikima leh thawktu dangte nèn inkawm hovin a tûk, ni 1 December, 2014 zing dâr 6:00-ah Aizawl panin kan haw leh ta a ni.

– Kawlchhuana Ralte

Bethlehem Kohhran Ramthar Committee Ziaktu

5.

1. **Field hming** : Tripura Mission Field
2. **Khua** : Pecharthol
3. **Tlawh hun chhúng** : Ni 27 Nov.–1 Dec., 2014
4. **Tlawhtu** : Vanbawng Kohhran
5. **Kal zât** : Mipa 14, hmeichhia 6
6. **Tlawh chhan** : Hnathawh
7. **Hnathawh** : Quarters sak leh chhuat chhùn
8. **Senso zât** : ₹ 53,281/-

Làwmawm lam : Pathian hruaina leh vennain tluang takin Pacharthol kan thleng a, Mission Compound-a thawktuten hlim takin min lo dawngsawng a. An inpêkna a fakawm kan ti hle. Inpawh tláng takin kan chàm chhúng zawngin hun kan hmang a, thlamuanthlâk kan ti hle. Hnathawh tûra an lo ruahman, lei vûng thiar pawh ni hnih chhúngin phur tak leh thatho takin kan thawk zo thei a, kan làwm hle mai.

Report tûl dang : Ni 29.11.2014 (Inrinni) zân khán Pastor thuthmun, Darchawi Kohhranah kan inkhâwm a. A tûk, Pathianni zânah hmun hnihah kan inthen a; Serhmun Kanan Kohhranah leh Pecharthol Kohhranah kan inkhâwm a. Kohhranho min lo dawnsawn dânah làwmawm kan ti hle. An zinga khawsak a nuam hle mai. Member an tam lo tláng hle a, kan tawngtâinaah i hre reng ang u.

Kan chàm hun tùr kan zo va, ni 1.12.2014 (Thawhtanni) zing dâr 6-ah inthlahlel takin, ‘Kan inhmuh kan intawh leh hma zawng Pathianin min véng tawn zêl rawh se’ tiin kan in-bye-bye liam leh ta a ni.

– Saithankima

Vanbawng Kohhran Ramthar Committee Ziaktu

6.

1. **Field hming** : Tripura Mission Field
2. **Khua** : Harimohan (Kolachhora Bial)
3. **Tlawh hun chhúng** : Ni 24 Nov.–1 Dec., 2014
4. **Tlawhtu** : Pavalai Páwl leh Ramthar Committee, Model Kohhran, Lengpui
5. **Kal zât** : Mipa 22, hmeichhia 6
6. **Tlawh chhan** : Hnathawh
7. **Hnathawh** : Biak In thutthleng, Biak In bathlâr, Pulpit, Lectern & Maichâm siam
8. **Senso zât** : ₹ 1,01,906/-

Lâwmawm lam : Kohhranhote jawngtâina avângin kal lam leh haw lamah tuang takin kan kal thei a. Pathian hruaina kan chang a, a lâwmawm kan ti hle. Kan tlawh kohhranah hian work camp-a kal hmasa ber kan ni a. Thawktute, kohhran mipuite leh Bialtu Pastor-ten min tawiawm tha a; kan Kohhran Committee mi panga laiin min ho thei bawk a. Kan awm laiin Bialtu Pastor hovin biak in bungraw tharte Pathian hnêna hlanna hun kan hmang a; kohhran chhúngkuate in kan tlawh kualin tawngtai hona hun kan hmang thei a, a lâwmawm kan ti hle. Thawktute leh kohhran kan tlawhte min lo dawnawn dânah kan lâwm hle.

Report tul dang : Kan chàm chhúng zân tin kan inkhâwm thin. Bial chhúnga kohhran hrang hrangte kan tlawh thei a, kohhran hmingin Harimohan Kohhranah thingpui no eng emaw zât, plastic chair leh silpaulin kan hlan a. Kohhran Pavalai Páwl hmingin Harimohan Kohhranah khuang pakhat leh Rs. 1,500/- leh Tripura *Rubber Plantation Colony* Kohhranah khuang pakhat kan hlan a, kan kalna khuah hian thing zaina khawl a awm loh avângin *pulpit*, *lectern* leh maichâm hi siam sain ka keng a ni.

– Rohmingthanga

Model Kohhran, Lengpui Ramthar Committee

7.

- 1. Field hming** : Home Mission North
- 2. Khua** : Tuipuibari II
- 3. Tlawh hun chhúng** : Ni 1–5 Dec., 2014
- 4. Tlawhtu** : Ramhlun North Kohhran
- 5. Kal zât** : Mipa 17, hmeichhia 3
- 6. Tlawh chhan** : Hnathawh
- 7. Hnathawh** : Sikul *ceiling* siam leh *electric wiring*
- 8. Senso zât** : ₹ 91,385/-

Làwmawm lam : Work Camp nei thei tùra min hruaitu leh work camp kan neih chhúng zawnga min òawngtaipuinat min tihhlawhtlinsaktu Pathian hnênah làwm thu kan sawi a. Thawktuten òa taka min lo dawngsawngin zanriah min lo buatsaihsak a, kan làwm hle a ni.

Report òul dang : Nl. Rohmingthangi Memorial School, Tuipuibari II-ah hian KG–Class VIII a awm a, zirlai naupang 270 an awm a. Hêng zinga 57-te chauh hi Kristian an ni. A khaw mite hi Kristian an la tlêm hle mai a, thawktute leh compound-a chêngte Krismas Present kan pe bawk a. Pi Loda Chakma (Kristian) damlo òanpuina kan pe bawk a ni.

– K. Lalbiakkima

Ramhlun North Kohhran Ramthar Committee Ziaktu

8.

- 1. Field hming** : Tripura Mission Field
- 2. Khua** : Choidomel
- 3. Tlawh hun chhúng** : Ni 1–5 Dec., 2014
- 4. Tlawhtu** : Chanmari West Hmar Veng Kohhran
- 5. Kal zât** : Mipa 21, hmeichhia 1
- 6. Tlawh chhan** : Hnathawh
- 7. Hnathawh** : Biak In sak
- 8. Senso zât** : ₹ 1,30,210/-

Làwmawm lam: Kan tum leh kan beisei angin Pathian hruaina avàngin Choidomel khuaah biak in

(21x15 ft), a chung leh *skirting* – rangva, a bang – dâpin tha taka sak zawh a ni a. Hna kan thawh chhúngin inhliam palh awm miah lovin kan beisei aia hmáin kan thawk zo thei a, kan láwm hle. Kan thawh chhúngin Bialtu Pastor leh thawktu dangten a tul apianga min buaipuiin phur tak leh thahnemngai takin min thawhpui a, kan láwm takmeuh a ni.

Report tul dang : Kan biak in sak hna tan a nih hmáin work camp kal ve zingá mi Rev. B. Ropiangan biak in lungphum a phúm a. Thahnemngai taka hna thawk zui nghalin ni 4 Dec., 2014-ah sak zawh a ni a. A zánah biak in hawn leh Pathian hnêna hlanna inkhâwm neih nghal a ni. Work camp-a kal zingá kan Leader, Upa R. Thangkiman hawngin Ganganagar Pastor Bial vawngtu Pastor P.C. Lalmuanawman Pathian hnênah a hlan a. T.Upa J.H. Hmingthanchuanga Pathian thuchah a sawi a; láwm avànga hnuk ulh teuh chung leh hlim taka fak hla sain he hmuna kan tih theih tâwk chu kan ti zo ta a ni. A rawngbâwl min phalsaktu kan Pathianin ropuina chang rawh se.

– T.Upa J.H. Hmingthanchuanga

Chanmari West Hmar Veng Kohhran Ramthar Committee

9.

1. **Field hming** : Cachar Tlángam
2. **Khua** : Noxatilla
3. **Tlawh hun chhúng** : Ni 2–4 Dec., 2014
4. **Tlawhtu** : Tuiṭha Veng Kohhran, Bilkhawthlir
5. **Kal zât** : Mipa 13, hmeichhia 2
6. **Tlawh chhan** : Hnathawh
7. **Hnathawh** : Sikul chung chih
8. **Senso zât** : ₹ 22,121/-

Lâwmawm lam : Tuiṭha Veng Kohhran, Bilkhawthlirin a indan aṭanga Mizoram pawn Mission Field kan tlawhna hmasa ber a nih avàngin lâwmawm kan tiin hlimawm kan ti a, a zawngchhang tlâk hlein kan hria. A hmuna thawkten min lo dawnsan dânah lâwmawm kan ti hle a ni.

Report tul dang : Kan Field zuk tlawha an quarters sak tukverh khàr 10 kan tumsak a. Quarters chhúngah lei chhùn hna thawh a ni bawk.

– Rosangzuala

Tuiṭha Veng Kohhran Ramthar Commt. Ziaktu, Bilkhawthlir

10.

1. **Field hming** : Barak Area
2. **Khua** : Patharkandi (*Bengali Project*)
3. **Tlawh hun chhúng** : Ni 10–12 Dec., 2014
4. **Tlawhtu** : Ṭumpui Pavalai Páwl Kohhran
5. **Kal zât** : Mipa 19
6. **Tlawh chhan** : Hnathawh
7. **Hnathawh** : Bairakhal – Kum 150 vêl kal taa Sâpho thlanmual hlui, an lo hmuhchhuah thar sam fai
8. **Senso zât** : ₹ 4,779/-

Hun hman dân : Ni 10.12.2014 tlai lam dâr 3:00-ah Patharkandi kan thleng a, Pu Lalbiaksanga, Evangelist-in min lo hmuak a. Zanriah ei khamah Sâp thlanmual hlui, an hmuhchhuah tharah kalin chutah chuan kan ṭawngṭai ho va. A tûk zing aṭangin thlanmuan tifai tùrin kan thawk chhuak a. Kan thawh zawh hmain a lo enkawltu Thingpui Huan Manager-in kan hnathawk minrawn chawlhṭir a; kum kha leh chen an lo enkawl tawh a nih avàngin NOC (kan kuta hlan phalna) min hlan nân ‘ 15,000/- an phut a, chu chu kan lo pêk loh vàng a lo ni a. Kan hawsan ta a ni.

Chhun dâr 12:00-ah Lalkhera khua (10-15 Km.) –a Adivasi hnam (hnam hnuaihning) zínga Bible tract sem tùrin kan thawk chhuak leh ta a. Páwl hnihah inṭhenin Bible tract kan sem a, min lo dawngsawng ṭha hle.

Dar 2:30 p.m.-ah kirsanin Kalighat khua kan pan leh a. Mosolman pa, Kristiana inpein a huan ram a pêka biak in an lo sakah kan ṭawngṭai a. Hetah hian chhúngkaw paruk awmin member 35-40 an awm a, ṭawngṭaipui an ngai hle.

Zân lamah chhúng inkhâwm neiin kan zai ho va, hlim takin hun kan hmang ho a ni. Kan cham chhúng

hian Pu Lalbiaksanga te chhúngkua kan hrawn a. Kan tibuai êm êm chung a an rawngbàwnaa thahnem an ngaihzia leh an tihtakzetzia kan hmuhin kawng tinrengah tanpui an ngai hle mai.

Report tul dang : He lai hmunah hian kum 150 vêl kal taah khân Sâp Kristiante an lo chêng thîn a. Tûn hnaia an sulhnu, biak in hmun hlui leh thlanmuala lungphunte an hmuh hian a hmunhma lo enkawltu thingpui huan company-te pawhin an hauh ngam ta lo va. Hetianga sum sen ngai lova nuai za tam tak man, ram zau tak, Agartala National Highway kawng kam, hmun ualau taka a lo awm reng mai hi a hlutzia kan la hre dawn chauh niin a lang. Mizoram mipui leh kohhrante hian kan la hmêlhriat vak lo na a, nghet leh changtlung taka inbun ngheh thuai thuai a chăkawmin a va nghahhlelhawm êm!

– P.B. Romawia

Tumpui Kohhran Pavalai Páwl Chairman, Kolasib

11.

1. **Field hming** : Cachar Tlângam
2. **Khua** : Baruatilla
3. **Tlawh hun chhúng** : Ni 9–13 Dec., 2014
4. **Tlawhtu** : Ramhlun East Kohhran
5. **Kal zât** : Mipa 19
6. **Tlawh chhan** : Hnathawh
7. **Hnathawh** : Biak in sak
8. **Senso zât** : ₹ 6,170/-

Report tul dang : Baruatilla khua hi Zaite Pastor Bial chhúnga mi a ni. Mizoram khawthlang ramri dep, Assam ram Karimganj District huam chhúnga awm a ni a, a mi chêngte hi Mizo hnahtlâk – Sakechep an ni. Kohhran hi kum 1977-ah din tan ni tawhin, dânzawhkim pawh 127 lai an ni. He lai hmuna chêngte hian min lo làwm thiam hle. Kan hnathawh min tawiawm tha hle a, an Kohhran Upa zawng zawngte leh kohhran mi eng emaw zâtin ni tin min pui reng a. An nun leh tawngkam a hawihhawmin an bula awm a nuam hle.

Kan biak in (48x32 ft) sak hi a hmanrua engkim an lo nei sa vek nachungin, hun rei lo têa sak zawh mai theih a nih loh avângin kan sak zawhpui hman lo va; sak zawhpui theih a chåkawm hle.

– T. Lalvula

Ramhlun East Kohhran Ramthar Committee Ziaktu

12.

1. **Field hming** : Home Mission South
2. **Khua** : Borapansury leh Khojoysury
3. **Tlawh hun chhúng** : Ni 16–18 Dec., 2014
4. **Tlawhtu** : Bethlehem Kohhran
5. **Kal zât** : Mipa 3
6. **Tlawh chhan** : Thawktute tlawh chhuah leh thilpêk hlan
7. **Senso zât** : ₹ 22,240/-

Report tul dang : Mizoram chhúng ngeiah ringlomi tam tak kan va hmu a. Thawktute an tlêm a, an indaih lo hle niin kan hria. Khojoysury-ah pheih chuan thawktu pahnih chauhvin biak in an sa a, an biak in sakna hmun a kâwmkâr hle bawk. A bul maiah tláng bawk nuam tak, biak in hmun atána tha tak a awm a. Chu chu a ram neituin a hralh phal nghe nghe a, leisaktu an mamawh hle. Thawktu kan va tlawhte hi Krismas ruai thehna tûr leh an mamawh atân pawisa kan pe bawk a ni.

– Kawlchhuana Ralte

Bethlehem Kohhran Ramthar Committee Ziaktu

COUNSELLING MAMAWHITE TÂN

Mi mal, nupa, fanau, chhúngkua, nulât tlangval, ringtu nun etc.-ah harsatna i neih chuan Family Guidance & Counselling Centre pan thin la, an lo tanpui ang che. Telephone leh internet hmang pazohin biakrâwn theih an ni.

Mission Veng, Aizawl - (0389) 2324443; Chanmari, Aizawl - (0389) 2306693;

Vaivakawn, Aizawl - (0389) 2344324; Chaphai - (03831) 234055;

Serchhîp - (03838) 226128; Kolasib - (03837) 220180

email: synodfjcc@gmail.com

ADMISSION NOTICE

Presbyterian Hindi Bible School, Bawngkawn, Mizoramah Hindi-a Bible zir duhte tán dil theih a ni leh ta e. Dilna chu *plain paper*-a ziakin Principal, Presbyterian Hindi Bible School hnênah theh luh theih a ni.

Hriat tùrte:

1. Diltu chuan Hindi (1) *Tawng* leh (2) *Chhiar* a **thiam ngei tùr** a ni. 2. Kohhran **danzawhkim** a ni tùr a ni. 3. Kohhran/Fellowship/Field Secretary, etc. **hriatpuina lehkha** thil tel tùr a ni. 4. Ram chhúng leh páwn (Mission Field) atanga zirlai tírtuten an mi tírhte School-a an awm chhúnga an damloh thu-ah enkawltu atán leh an haw lehna tùra senso thilah leh a hnuaia mi ang thilahte, Local Guardian ngaihtuhsak tùr a ni. 5. Diltu chu natna benvawn nei lo a ni tùr a ni.

Guardian/Zir tùrte chuan hengte hi intum tùr a ni:

1) Smart dress with shoes, coat-pant; 2) Full bedding with mosquito net; 3) Stationery, etc.; 4) Hindi Holy Bible, Hindi song book and Masihi Sangati Sunday School book; 5) Mug & bucket with plate; 6) Torch-light, umbrella; 7) Return senso; 8) Passport size photo, 2 nos.

Zir hun chhúng : 15th January–9th June, 2016

Dil theih hun chhúng : **14th January, 2016**

Interview hun : 15.01.2016, 11: 00 a.m.

A hmun : Principal's Office, Bawngkawn

Sd/-

(REV. JOHN SHARMA)

Principal

Presbyterian Hindi Bible School, Bawngkawn

Ph. No. 0389-234117/9862428437/9402111624

PATHIAN THU ZIR DUH TAN

Presbyterian Bible School, Mission Veng, Aizawlah C. Th (Certificate in Theology) zir tùr lăk a ni dawn a, dil duh chuan hêng hi hriat tùr a ni e:

1. Admission Form Office-ah ₹ 10.00 (*cheng sawm*)-a lei tùr a ni a, **December 3, 2015** (Ningani) **tlai dár 3:00** thleng PBS Office-ah theh luh theih a ni. Diltu chu Pawl sarhi (Class VII) passed, kum 16 aia naupang lo, Kohhran dân chhúnga awm a ni tùr a ni.

2. **December 17, 2015 (Ningani) zing dár 10:00**-ah interview neih tùr a ni a, lăkte chuan **January 15, 2016 (Zirtawpni)**-ah Class tán tùr a ni.

3. Zir hun chhúng thla li *i.e.* **January – April, 2016** a ni a, zirlai pakhat hnênah Stipend ₹ 500/- thla khatah pěk thín a ni. Hostel a awm lo. Hre chiang duh tán Phone No. **2317343/2325082/9436198231**-ah zawh fiah theih a ni.

Rev. Lalneihvura
Principal
Presbyterian Bible School

BAWANI FELLOWSHIP BIAK IN

He Biak In tláwm
tak hi Jharkhand
Mission Field
chhúnga Kathikund
Bial chhúnga awm a
ní a.

Túnah hian member
80 vèl awmin, he
Biak In hi anmahni
kutkawih ngela an
sual chhuah a ni.

Ni 27 September,
2015 (Pathianni)
khán hawn a ni.



SAP KRISTIAN-TE HMUN HLUI

Patharkandi-a Sâpho thlan hlui
leh an Biak In hlui (phêk 8 -13
& 29 - 30)



Postal Regn. No MZR/46/2015-2017

RNI Regn. No. 40889/88



Japralangso Fellowship. Sarihajan Bial-a
Lalpa Zanriah Sakramen Dawhkan chu!
(Karbi Anglong Mission Field)



Yeksi (Boleng Pastor Bial) khuua kan Kohhran Biak In. Biak In
hnunga in lo lang hi Missionary nula chenna a ni.
Arunachal 'West' Mission Field

TO RAMTHAR

If not delivered please return to:
The Manager
Ramthar Chanchinbu
Synod Office, Aizawl, Mizoram,
India. Pin - 796005

**Published by Rev. Lalchuanmawia and Printed at the
Synod Press, Aizawl on behalf of Ramthar Association,
Aizawl, Mizoram. Copies- 30,500
Visit us: www.mizoramsynod.org**